



Ազդարարության Trumpet's Sound **փող**

51-րդ ՏԱՐԻ, ԱՄՏՐԱԼԻԱ
ՄԱՅԻՍ - ՅՈՒՆԻՍ 2020



«ԱԶԳԱՐԱՐՈՒԹԵԱՆ ՓՈՎ»
երկամսյա հոգեւոր թերթ

Պատասխանատու խմբագիր՝
հովիւ Հրաչ Գույումեան

ACM AUSTRALIA
PO BOX 1593,
CHATSWOOD NSW 2057
EMAIL: hkiujian@acmaust.org
URL: www.acmaust.org



Բովանդակություն

Ինծմէ գատ ուրիշ աստուածներ
չունենաս. **3**

Հովիւ Հրաչ Գույումեան

Սաղմոս 2. **4**

Տոն Սրորմիր

Մատթեոս 8:1-13 **7**

Բաֆֆի Զափարեան

Քալել՝ մեր կոչումին վայել **10**

Վեր Հասկիս Արամանի

Յուսոյ Աստուած **11**

Նէյլ Պորման

Կործանուած՝ թղթախաղի
պատճառով **13**

Քաղուած

Հայ քրիստոնէական
առաքելութիւն **15**

Հովիւ Հրաչ Գույումեան

Կազմի նկարը՝ ընտրուած:

Փառաբանություն / աղօթք

- Փառք տանք Տէրոջը ամէն բաներու համար, քանի որ Ան բարի է:
- Աղօթեցէ՛ք ԱՄՆ-էն Հայաստան հասած բեռնարկղի արագ բաշխման համար:
- Աղօթեցէ՛ք 19-րդ բեռնարկղի Հայաստան ապահով հասնելու համար:
- Աղօթեցէ՛ք նիւթական աջակցութեան կարիք ունեցող մեր հիւանդներուն համար:
- Աղօթեցէ՛ք մեր աշխատակիցներու համար մինչ կապ կը պաշտպանեն մեր բոլոր կարիքաւոր ընտանիքներուն հետ:
- Աղօթեցէ՛ք COVID 19-ով հիւանդացած մեր հայրենակիցներուն համար:

Ինծմէ՛ գատ ուրիշ աստուածներ չունենաս

Առաջին պատուիրանը կ'ըսէ. «Ինծմէ՛ գատ ուրիշ աստուածներ չունենաս»:

Այո՛, մենք փրկուած ենք եւ այլեւս հին պատուիրաններով չենք ապրիր: Բայց Յիսուսը չիսխտեց ոչ մէկ պատուիրան: Պատուիրանները Աստուծոյ կողմէ՛ մեզի տրուած հրամաններ են, որպէսզի կարողանանք Իրեն հաճելի կեանքով ապրիլ: Այս պատուիրանները մեզի կը պահեն աշխարհէն ու չարէն:

Որպէս մարդիկ, մենք մեզի համար շատ աստուածներ կը շինենք. աստուածը բան մըն է, որը կը սիրենք եւ առանց ատոր չենք կրնար ապրիլ, անոր անհամբերութեամբ կը սպասենք, ան կը գրաւէ մեր միտքը եւ մեզ այլ բաներէ հեռու կը պահէ:

Արդեօք Աստուած առաջին տեղը կը գրաւէ՞ ձեր կեանքին մէջ, թե՞ զբաղուած էք այլ բաներով եւ աստուածահաճոյ բաներու համար երբեք ժամանակ չունիք: «Եթէ Ան ամէն ինչի տէրը չէ, ուրեմն Ան Տէր չէ»: Եթէ Ան ձեր կեանքի առաջին տեղը չի զբաղեցներ, եթէ Անոր մասին չէք խորհրդածեր, Աստուածաշունչ չէք կարդար, չէք աղօթեր, Իրեն հետ չէք հաղորդակցուիր, Աստուածաշունչ չէք սերտեր, եկեղեցական ժողովներու չէք մասնկացիր, հոգեւոր բաներու համար ժամանակ չունիք, ուրեմն ձեր կեանքին մէջ այլ բաներ կան, որոնք առաջնային են ձեզ համար:

«Քու անձդ աստուածպաշտութեան վարժեցուր» (Ա Տիմ. 4:7): Մեր կեանքին մէջ Աստուծոյ առաջին տեղը տալու համար ինքներս մեզ պէտք է մարզենք, մենք պէտք է ծրագրենք մեր օրը, աւելի ուշադիր քննենք այն բաները, որոնք զբաղ կը պահեն մեզ. ատոնք կրնան ըլլալ ձեր հանգիստը, զուարճութիւնները, սիրելի զբաղմունքները, աշխատանքը... եւ եթէ ասոնցմով չափազանց զբաղուած էք, ուրեմն զգո՛յշ եղէք, որ ստրուկ չդառնաք ու ձեր մէջքը չտաք աստուածային բաներուն:

Կող. 3:2-ը կեանքիս մէջ շատ օգտակար եղաւ. «**Վերին բաները մտածեցէ՛ք**»: Ձեր անձերը աստուածահաճոյ գործերով զբաղ պահե-

ցէ՛ք, խնդրեցէ՛ք Տէրոջը, որ ձեզ ծանրաբեռնէ ծառայութեան համար, խնդրեցէ՛ք ձեր երէցներուն կամ հովիւներուն եկեղեցիին մէջ պարզ պարտականութիւններով գործունեայ պահել ձեզ, օրինակ՝ եկեղեցիի սրահը մաքրելը, մէքենայով մարդկանց տուն հասցնելը եւ այլն: Դուք պիտի զարմանաք, թէ ինչպէս Աստուած հասարակ մարդուն կրնայ վերցնել եւ Իր փառքին համար օգտագործել:

«Ինծմէ՛ գատ ուրիշ աստուածներ չունենաս»: Եթէ Ան ձեր Աստուածն է, ուրեմն ձեր ամբողջ կարողութեամբ ծառայեցէ՛ք զԻնք լաւագոյն ձեւով, ծառայեցէ՛ք զԻնք առանց որեւէ վարձատրութեան աւերակալիքի, քանի որ ձեր վարձատրութեան գանձերը Երկինքի մէջ պահուած են ձեզ համար:

Տէրը օրինէ ձեզ:

Հ. Գ.

Սաղմոս 2

Կարդացէ՛ք 2-րդ Սաղմոսը

Որոշ սաղմոսներ կոչուած են Մեսիական սաղմոսներ: Անոնք յըստակ կը մատնանշեն Տէր Յիսուսին: Նոր Կտակարանին մէջ այս սաղմոսները մէջբերուած են Յիսուսի մասին հղում ընելու համար: 2-րդ Սաղմոսը միանշանակ Մեսիական է. ան մէջբերուած է ինչպէս Գործք Առաքելոց գրքին մէջ, այնպէս ալ Եբրայեցիս նամակին մէջ, ու երկու հատուածներուն մէջ կիրառուած են Տէր Յիսուսի համար: Ան կոչուած է Միածին Որդի, ով Միօնի սուրբ լեռան վրայ օծուած է, որպէս Թագաւոր:

Սաղմոսերգիչը ժողովուրդները կը նկարագրէ՝ ըմբոստացած Տէր Աստուծոյ ու Անոր Օծեալին դէմ: Անմտութեամբ անոնք կը խորհին, թէ կարող են Մեսիային յաղթել. իրականութեան մէջ անոնք կը քալեն ամբարիշտներուն խորհրդով: Ազգերու իշխանները մէկտեղ խորհուրդ կ'ընեն ու իրենց դիրքերը կը հաստատեն Տէրոջը ու Անոր Օծեալին դէմ: Այս թագաւորները մեղաւորներու ճամբուն մէջ կը կենան: Անոնք նման են ծաղրողներու, ովքեր կը կարծեն, թէ կարող են կոտորել այն

կապերը, որոնցով կը ղեկավարուին ու մէկդի նետել իրենցմէ Անոր լուծը:

Ազգերը միշտ պատկերացուցած են, թէ կարող են Աստուծոյ անտեսել կամ մերժել Անոր պատուիրաններուն հնազանդիլ: Մովսէսի ժամանակ փարաւոնը մերժեց Տէրոջը հնազանդիլ այնքան ժամանակ մինչեւ Աստուած դատաստանով ցոյց տուաւ Իր բազուկի մեծ զօրութիւնը: Ինը պատուհասներու ժամանակ փարաւոնը մերժեց հնազանդիլ, բայց Աստուած խոնարհեցուց ու 10-րդ պատուհասով խստօրէն պատժեց զինք: Նաբուգոդոնոսորը մտածեց, թէ ինքն իր ուժերով հասած է մեծ փառքի, բայց Աստուծոյ կողմէ պէտք է սորվէր, որ Երկինքի մէջ եղող Աստուածն է, ով կը բարձրացնէ որո՞ւ որ կ'ուզէ ու կը խոնարհեցնէ անոնց, որոնց կ'ուզէ, երբ անոնք չեն ուզէր Իր հեղինակութեանը ենթարկուիլ:

Ամենակարողը պիտի ծիծաղի Իրեն հակառակողների վրայ: Ինչո՞ւ ոչնչութիւն եղող մարդը պիտի մտածէ, թէ կարող է դիմակայել Աստուծոյ կամքին: Երկինքի մէջ բնակող Աստուած մարդու գործերուն կը նայի ու արդարացի արհամարհանքով կը պատասխանէ անոր: Բայց Աստուած պարգապէս չի ծիծաղիր մարդու փորձերու վրայ, ով իրեն կ'ուզէ գերիշխան դարձնել: Ան խիստ գործողութիւններու կը դիմէ բոլոր անոնց նկատմամբ, ովքեր չեն ընդունիր Իրեն ու Իր Օծեալին: Ան Իր բարկութեամբ պիտի խօսի անոնց հետ եւ Իր սրտմտութիւնով պիտի խռովեցնէ զանոնք: Ապագային, երբ նեղը փորձէ իրեն հաստատել որպէս աշխարհի գերիշխան, Աստուած պիտի դատապարտէ զինք ու այդ ժամանակ Քրիստոսը արդարութեամբ պիտի թագաւորէ այս աշխարհի վրայ:

Աստուած որպէս անհերքելի փաստ յստակ կ'ընէ, որ Ան Իր Թագաւորին օծեց Իր սուրբ լեռան՝ Սիօնի վրայ: Կասկած չկայ, որ օր մը Տէր Յիսուսը պիտի վերադառնայ երկիր ու Իր հազարամեայ թագաւորութիւնը հաստատէ ամբողջ աշխարհի վրայ:

Մեր Տէր Յիսուսի մասին Աստուած ըսաւ. «Դուն Իմ Որդիս ես: Ես այսօր քեզ ծնայ»: Տէր Յիսուս մարդ դարձաւ, կատարեալ կեանք ապրեց եւ քաւարար մահով մեռաւ: Այժմ Աստուած Իրեն ժառանգութիւն խոստացաւ. «Խնդրէ՛ Ինձմէ, ու հեթանոսները Քեզի ժառանգութիւն պիտի տամ, ու երկրի ծայրերը՝ Քեզի ստացուածք»: Երբ վեր-

ցընէ Իր ժառանգութիւնը, Ան ամբողջովին պիտի տապալէ Իր թշնամիներուն. «Ձանոնք երկաթէ գաւազանով պիտի կոտրես, բրուտի ամանի պէս պիտի փշրես զանոնք»:

Ո՞րն է սաղմոսերգիչի խրատը: Այս աշխարհի թագաւորներուն ու դատաւորներուն խորհուրդ կը տրուի իմաստուն ըլլալ: Իմաստութիւն է վախով Տէրոջը ծառայել ու Իր առջեւ ակնածանքով ուրախանալ: Ճշմարիտ մեծարանքը պէտք է Որդիին տրուի. մենք պէտք է ընդունինք Անոր հեղինակութիւնը եւ անկեղծութեամբ ու երկրպագութեամբ ծառայենք զԻնք:

Որդիին անկեղծ մեծարանք տալու համար հիմնաւոր պատճառ կայ: Անոնք, որոնք կը մերժեն Որդին մեծարել, ստիպուած պիտի ըլլան Անոր բարկութեանը բախուիլ. անոնք պիտի կործանին, երբ Անոր զայրոյթը բորբոքի: Բայց օրհնութիւն կայ բոլոր անոնց համար, ովքեր Անոր մէջ ապաստան կը գտնեն: Անոնք չեն բախուիր Անոր բարկութեանը, այլ կը փորձառեն Անոր մեծ բարութիւնը:

Սաղմոսի այս պատգամը ոչ միայն երկրի թագաւորները պէտք է լսեն: Շատ մարդիկ կը կարծեն, թէ կարող են Աստուծոյ անտեսել կամ ըմբոստանալ Իր դէմ՝ առանց որեւէ հետեւանք ունենալու: Բայց Աստուած չի ծաղրուիր: Այն Ինչ մարդը կը ցանէ նոյնը պիտի հնձէ: Պիտի գայ օր մը, երբ Տէր Յիսուսին հնազանդիլ մերժողները ստիպուած ըլլան ծունկի գալ Անոր առջեւ: Իւրաքանչիւրիս համար կարեւոր է, որ հիմա հաւատարմօրէն յանձնուինք Տէր Յիսուս Քրիստոսին՝ Անոր ընդունելով որպէս Տէր ու Փրկիչ: Այդ ժամանակ մենք վստահ կրրնանք իմանալ, որ պիտի վայելենք Անոր յաիտենական օրհնութիւնները:

Տոն Սթորմըր



«Ինչպէս եղջերուն ջուրի վտակներուն կը փափաքի, այնպէս ալ իմ անձս քեզի կը փափաքի, ով Աստուած» (Սաղմոս 42:1):

Մատթէոս 8:1-13

Լեռան քարոզն աւարտելէն ետքը Յիսուսը լեռնէն վար իջաւ: Շատ մարդիկ, ովքեր հասկցան, թէ Յիսուսը նման չէ իրենց դպիրներուն եւ ուսուցիչներուն, սկսեցին հետեւիլ զԻնք: Այդ խումբին մէջ խումբ մը մարդիկ կային, ովքեր իրենց խնդիրներով ու կեանքի փորձութիւններով դիմեցին Իրեն (Մատթ. 8:2): Յուսահատ բորոտ մըն էր, ով կը հաւատար, թէ Յիսուսը կրնայ զինք բժշկել, եթէ պարզապէս ուզէ այդպէս:

Քիչ անց ուրիշ մարդու մը կը հանդիպինք, ով բաւականաչափ վրտահ էր ու գիտէր, որ Յիսուսը կրնայ զինք օգնել: Ան նոյնպէս իր կեանքի հարցերով ու փորձութիւններով դիմեց Յիսուսին (Մատթ. 8:5-6): Այս մարդը այնքան հաւատք ունէր, որ գիտէր, որ եթէ Յիսուսը միայն խօսքով զրուցէր՝ առանց դիպչելու կամ մօտ ըլլալու, ապա իր ծառան կը բժշկուէր:

Երկու սլատմութիւններուն մէջ Յիսուսը բժշկեց մարդկանց: Իրականութեան մէջ Յիսուսը երկրի վրայ Իր ծառայութեան ընթացքին շատ նման հրաշքներ կատարեց. Ան մարդկանց յարութիւն առնել տուաւ, կոյրերուն աչքերը բացաւ, կաղերուն եւ խուլերուն բժշկեց եւ այլն: Հարցը, որը յաճախ կը տրուի հետեւեալն է. «Արդեօք Յիսուսը կրնա՞յ այսօր բժշկել»:

Այս հարցին սլատասխանը սա է. «Այո՛, Յիսուսը կրնայ բժշկել այսօր»: Աստուածաշունչը հիւանդներուն կը քաջալերէ, որ աղօթք ընեն (Յակ. 5:14): Այնուամենայնիւ, բժշկութեան մասին շատ սխալ հասկացողութիւններ կան այսօր: Շատեր կ'ըսեն. «Յիսուսը նոյնն է երէկ, այսօր ու յաւիտեան», ու կը պնդեն, թէ քանի որ Յիսուսը չի փոխուիր, ուրեմն ճիշտ այնպէս, ինչպէս Ան եւ առաքեալները բժշկեցին մարդկանց, այնպէս ալ հիմա նոյնը կը կատարուի:

Ճիշտ է, Յիսուսը նոյնն է Իր աստուածային բնոյթով. Ան չի փոխուիր: Ան նոյնն է նաեւ Իր զօրութիւնով (ամենակարողութիւնով). Ան կրնայ մարդկանց բժշկել այսօր եւ կը բժշկէ ալ: Այնուամենայնիւ, Սուրբ Հոգին ծառայութիւնը փոխուած է այն իմաստով, որ Ան այլեւս

չի միջամտէր մարդկային պատմութեան մէջ կամ Իրեն չի յայտնէր այնպէս, ինչպէս առաջ կ'ընէր: Աստուած անցեալին շատ բաներ ըրաւ, որոնք հիմա չ'ընէր. արարչագործութիւնը. ջրհեղեղը, ուղղակիօրէն եւ բացայայտօրէն մարդկանց հետ խօսիլը, մարգարէներուն եւ առաքեալներուն Իր խօսքերը գրել պատուիրելը... Քանի որ Աստուած աւարտեց Իր յատուկ յայտնութիւնը, Ան այլեւս չի խօսիր մարդու հետ՝ նոր բաներ յայտնելու համար, ինչպէս ոմանք կը պնդեն ըսելով. «Յիսուսը երազիս մէջ երեւցաւ ու ըսաւ այս կամ այն ընել»:

Աստուած տարբեր ժամանակներու մէջ Իր նպատակներուն համաձայն տարբեր կերպերով գործեց մարդկային պատմութեան մէջ: Ահա թէ ինչու 7 տարուայ Մեծ նեղութեան ժամանակաշրջանը պիտի ըլլայ այնպէս, ինչպէս պատմութեան մէջ երբեւէ չկրկնուող իրադարձութիւն: Աստուած այնպէ՛ս պիտի ցուցադրէ Իր վեհութիւնն ու զօրութիւնը, որ անցեալի մէջ երբեւէ չէ կատարուած: Ան պիտի յայտնուի որպէս թագաւորներու Թագաւոր եւ տէրերու Տէր, եւ Իր զայրոյթը պիտի թափէ այնպէս, ինչպէս պատմութեան ընթացքին երբեւէ չէ եղած:

Հետեւաբար, Աստուած այսօր կը բժշկէ հիւանդներուն, բայց ոչ այնպէս, ինչպէս Ան կամ առաքեալները ըրին, երբ աղօթքով, խօսքով կամ դիպչելով մարդիկ կը բժշկուէին կամ նոյնիսկ մեռելներէն յարութիւն կ'առնէին: Աստուած այլեւս այդ կերպ չի գործէր: Իսկ ինչո՞ւ Յիսուսը նման հրաշքներ կատարեց (Մատթ. 8:4):

Այդ հրաշքները Իր ով ըլլալու վկայութեան համար էին, Ան Աստուծոյ Որդին է, Երկինքի ու երկրի Արարիչը: Յիսուսի հրաշքները վաւերացուցին Իր Անձի մասին Իր պնդումը (Յովհ. 2:11, Յովհ. 20:30-31): Առաքեալներու պատգամը նոյնպէս հրաշքներով ու նշաններով հաստատուեցաւ (Մարկ. 16:17-18):

Նոյնը ճշմարիտ է առաքեալներու պարագային (Մարկ. 16:20): Որո՞նք էին Մարկ. 16:17-18-ի նշանները: Երբ այդ վաւերացուեցաւ եւ յատուկ յայտնութիւնը ամբողջացաւ (Աստուածաշունչը), Աստուած փոխեց Սուրբ Հոգիի ծառայութեան կերպը: Իրականութեան մէջ ասիկա կը տեսնենք նաեւ առաքեալներու ժամանակ, ովքեր իրենց ծառայութեան աւարտին չկարողացան բոլորին բժշկել (Բ Տիմ. 4:20, Բ Կորնթ. 12:7-9ա, Ա Տիմ. 5:23): Մենք պէտք է նաեւ հասկնանք, որ նոյ-

նիսկ Յիսուսի ծառայութեան ընթացքին ոչ բոլորը բժշկուեցան: Այնպէս չէ, որ աշխարհի բոլոր հիւանդ մարդիկ բժշկուեցան, երբ Տէր Յիսուսը երկրի վրայ էր (Յովհ. 5:1-9), ինչը ցոյց կուտայ, որ շատերէն միայն մի քանի հոգի բժշկուեցան:

Աստուած տակաւին կը բժշկէ այսօր: Երբ անձը հիւանդ է, ան պէտք է աղօթէ, եւ միւսները պէտք է աղօթեն հիւանդներուն համար ու վըստահեն Անոր կամքին ու ժամանակին, որպէսզի անձը բժշկուի: Այնուամենայնիւ, քանի որ այլեւս պատգամը կամ անձը վաւերացնելու կարիք չկայ, այլեւս նշաններու կարիք չկայ, քանի որ Աստուծոյ Խօսքն ամբողջական է եւ Աստուած այն յայտնած է այնքանով, որքանով պէտք է իմանանք: Հետեւաբար, այսօրուայ, այսպէս կոչուած «բժշկութեան ծառայութիւնները» եւ «բժշկողները» շատ անտեղին, կեղծ ու ոչ սուրբգրային են: Ահա թէ ինչու պէտք է Աստուածաշունչը կարդանք: Ի դէպ, կեղծ մարգարէները կարիք չունին ամէն ինչ սխալ ըսելու կամ ընելու: Եթէ անոնց ըսածի կամ ըրածի մէկ մասը սխալ է, ապա իրենք կեղծ ուսուցիչներ են:

Հաւատքի վերաբերեալ մէկ այլ սխալ մօտեցում կայ, որ մարդիկ յաճախ կ'ըսեն. «Կարենորը հաւատք ունենալն է», «Քանի դեռ ինչ որ քանի կը հաւատաս...», «Ես այսպէս կը հաւատամ», «Կարենոր չէ, թէ ինչ կ'ընես կամ ինչպէս կ'ընես, քանի դեռ հաւատք ունիս» եւ այլն...:

Եկէ՛ք վերլուծենք Յիսուսի ըսածները: Ի՞նչ կը նշանակէ «... Ինչպէս դուն հաւատացիր» խօսքը: Ինչպէ՞ս եւ ինչի՞ն հաւատաց հարիւրապետը: Ան հաւատաց միայն Յիսուսին, եւ որ Անոր Խօսքը բաւարար էր բուժելու համար: Նոյնը ճշմարիտ է նաեւ բորոտի պարագային: Անոնք Յիսուսի մասին սխալ կարծիք չունէին, իրենց հաւատքը իրենց հասկացողութեամբ չէին մեկնէր:

Անոնք հաւատացին Յիսուսին, որ Ան է Աստուծոյ Որդին, Աստուծոյ խոստացեալ Մեսիան: Անոնք ամբողջովին հաւատացին Յիսուսին, եւ որ Ան կարող էր իր բժշկել: Իրենց հաւատքի մէջ որեւէ սխալ բան չկար: Յիսուսը հաստատեց, որ անոնց հաւատքը ճիշտ էր, եւ քանի որ ճիշտ էր՝ Ան պարզեւեց անոնց խնդրանքը:

Հետեւաբար, ինձի եւ ձեզի համար կարենոր է քրիստոնէութեան, հաւատքի ու փրկութեան մասին եղած բոլոր սխալ պատկերացումներն

ու թիրմբոնումները մէկ կողմ դնել: Այդ իսկ պատճառով շատ կարեւոր է Սուրբ Գիրքը կարդալ եւ ուսումնասիրել, որպէսզի ճիշտ հաւատք ունենանք, ճշմարտութեանը հաւատանք (Բ Պետ. 3:18):

Բաֆֆի Չափարեան

Քալել՝ մեր կոչումին վայել

Աստուծոյ Խօսքին մէջ «քալել» կը նշանակէ ապրելակերպ: Քալել Աստուծոյ ճամբուն մէջ կը նշանակէ Աստուծոյ հաճելի կեանք մը ապրիլ:

Պօղոս առաքեալ Եփես. 4:1-ի մէջ կ'ըսէ. «Ուստի կ'աղաչեմ ձեզի, եւ որ Տէրոջը համար կ'ապուած եմ, որ դուք այնպէս քալէք ինչպէս կը վայել այն կոչումին որով կանչուեցաք»: Առաքեալը կոչ մը կ'ուղղէ եւ աղաչանք մը կը ներկայացնէ Եփեսոսի հաւատացեալներուն, եւ բոլոր դարերու քրիստոնեաներուն, որպէսզի անոնք իրենց կոչումին վայելուչ քալեն եւ ապրին:

Ապրելակերպերը զանազան են: Մարդիկ կ'ապրին իրենց տնտեսական եւ ընկերային կեանքի մակարդակին համեմատ: Իւրաքանչիւրս ունինք իւրայատուկ ապրելակերպ մը, որ կախեալ է զանազան տուեալներէ: Սակայն երբ հարցը կուգայ հոգեւոր կեանքի եւ ապրելակերպի, միայն մէկ ապրելակերպ կայ, այդ ալ մեր կոչումին վայել ապրիլն է:

Աստուծոյ Խօսքը կը յորդորէ մեզ կանչող Սուրբին պէս սուրբ ըլլալ: Ուրեմն մեր կոչումը սուրբ կեանք մը ապրիլ է: Յովհաննէս առաքեալ այդ ճշմարտութիւնը կը մեկնէ եւ շատ պարզ ու հասկնալի բառերու մէջ կը դնէ. «Ան որ կ'ըսէ թէ Անոր մէջ կը բնակի, այնպէս պէտք է քալէ ինչպէս Անիկա (այսինքն Յիսուս) քալեց»: Ահաւասիկ յստակ եւ ըմբռնելի սուրբգրային ճշմարտութիւնը, թէ եթէ կը վկայենք որ Յիսուս մեր մէջ կ'ապրի՝ կը պարտինք ապրիլ նման Յիսուսի:

Վեր. Հապիպ Ալաճաճի

Յուսոյ Աստուած

«Արդ՝ յուսոյ Աստուածը ձեզ լեցնէ կատարեալ ուրախութիւնով ու խաղաղութիւնով՝ ձեր հաւատքին համաձայն, որպէս զի ձեր յոյսը առատանայ Սուրբ Հոգիին զօրութիւնովը» (Հռովմ. 15:13):

Պօղոսը հիանալի կարողութիւն ունէր մեծ ու ճոխ ճշմարտութիւնները մի քանի բառով արտայայտելու: Հռովմայեցիներուն ուղղուած նամակի այս մէջբերումը ըստածի վառ օրինակ է:

Ո՞վ է «**յուսոյ Աստուած**»-ը: Ան է, ով Իր բնոյթով ու գործերով փառաւոր ճակատագրի աղբիւրն ու գրաւականն է, որուն Աստուծոյ զաւակները վստահութեամբ ու եռանդով կրնան սպասել: Աշխարհային յոյսը ոչ աւելին է, քան դրական մտածելակերպը, բայց մեր յոյսը հաստատուած է յուսոյ Աստուծոյ վրայ:

«**Արդ՝ յուսոյ Աստուածը...**»: Այո՛, յուսոյ Աստուածը ով մեզ Իր հետ հաղորդակցութեան կը հրաւիրէ կ'ուզէ, որ ճշմարիտ ու կենդանի յոյս ունենանք: Հաւատքի պէս յոյսը կարելի է քրիստոնեայի կեանքին համար: Իրականութեան մէջ, Աստուծոյ հետ մտերիմ ըլլալու աստիճանը կրնանք չափել անձի սրտին մէջ եղած յոյսի չափով: Յուսոյ Աստուծոյն ճանչնալ կը նշանակէ յոյս ունենալ:

Սիրելի՛ Աստուծոյ զաւակ, արդեօք միայն այս կեանքի համար կ'սպիրի՞ք: Արդեօք Ղովտի՞՞ նման էք, ով ընտրեց ներկայ առաւելութիւնը, թէ՞ Աբրահամի նման էք, ով յոյսով հաշուեց աստղերը: Աստուծոյ հետ հաղորդակցուելով եւ Անոր ճշմարտութեան լոյսի տակ մնալով մենք աւելի ու աւելի կը ձգտինք ու կ'ակնկալենք Անոր խոստումներուն կատարումը: Յարութիւնը մօտ է, մեր յարութիւնը... երբ մահը պիտի պարտուի ու կեանքը ժայթքի, երբ մենք Անոր նման պիտի ըլլանք ու զինք տեսնենք այնպէս, ինչպէս որ է: Այդ օրը այս աշխարհն ու կեանքը իրենց բոլոր դժուարութիւններով ու ցաւերով պիտի դիտարկուին, որպէս երբեւէ պատմուած ամենամեծ պատմութեան կարճ նախաբանը:

«**Արդ՝ յուսոյ Աստուածը ձեզ լեցնէ կատարեալ ուրախութիւնով ու խաղաղութիւնով...**»: Մեր յոյսը հաստատ է: Տէրը մեզ այժմ կը լեցնէ

ուրախութիւնով ու խաղաղութիւնով՝ հաւատքի միջոցով: Հաւատքը սոսկ մի քանի ճշմարտութիւններու հանդէպ մտաւոր համաձայնութիւնը չէ: Տէր Յիսուս Քրիստոսի հանդէպ մեր ունեցած հաւատքը կապ կը ստեղծէ մեր ու աներեւոյթ իրականութեան միջեւ: Ինչպէ՞ս: Սուրբ Հոգին կը կնքէ բոլոր անոնց, ովքեր Աստուծոյ սեփականութիւնն են, ովքեր կը խոնարհին Որդիին առջեւ, ովքեր իրենց անձերը կը խոնարհեցնեն եւ իրենց սիրտն ու կեանքը Անոր կը նուիրեն: Մեր մէջ ներքնակող Սուրբ Հոգին է, որ մեզ կը միաւորէ Քրիստոսի հետ: Ան կ'օգնէ մեզ տեսնելու եւ ճանչնալու Անոր գեղեցկութիւնը, զօրութիւնն ու բաւարարութիւնը: Քրիստոս Յիսուսի միջոցով ձեռք բերուած փառահեղ ազատութեան եւ խաչի վրայ թափուած Իր արեամբ ձեռք բերուած հաշտութեան շնորհիւ մեր մէջ ուրախութիւն եւ խաղաղութիւն կ'առաջանայ: Շատերը գուցէ պնդեն, թէ կը հաւատան, բայց անոնք չեն խոնարհիր, այլ Տէրոջ առջեւ ոտքի կը կենան, կարծես թէ Իր հետ կ'ուզեն բանակցիլ: Ասիկա փրկարար հաւատք չէ, ոչ ալ այնպիսի հաւատք մը, որը ինչ-որ մէկուն ուրախութեամբ ու խաղաղութեամբ կը լեցնէ:

«Արդ՝ յուսոյ Աստուածը ձեզ լեցնէ կատարեալ ուրախութիւնով ու խաղաղութիւնով՝ ձեր հաւատքին համաձայն, որպէս զի ձեր յոյսը առատանայ...»: Պօղոսը երկակի սկզբունքներու մարդ չէր: Ան կը փափաքէր, որ հաւատացեալներու կեանքի իւրաքանչիւր մասը յոյսով շաղախուած ըլլար, որպէսզի անոնք ալ Աստուծոյ մեծ ծառաներուն պէս հոգեւոր հեռատեսութիւն ունենան: Մանկական հաւատքով սկսած մեր հոգեւոր կեանքը կ'առաջնորդէ դէպի առատ յոյսի:

«Արդ՝ յուսոյ Աստուածը ձեզ լեցնէ կատարեալ ուրախութիւնով ու խաղաղութիւնով՝ ձեր հաւատքին համաձայն, որպէս զի ձեր յոյսը առատանայ Սուրբ Հոգիին զօրութիւնովը»: Մենք երբեք հաստատուն յոյս չենք կրնար ունենալ դրական մտածելակերպի, երեւակայութեան կամ անձնական ջանքերու միջոցով: Սուրբ Հոգին կը վերափոխէ մեզ, որպէսզի Աստուծոյ համար առանձնացած ըլլանք: Փոխակերպութիւնը հաւատացեալի կեանքին մէջ Աստուծոյ զօրութեան ճշմարիտ ապացոյցն է: Այն ինքն իրեն չի դրսեւորէր աշխարհի կամ աշխարհիկներու վրայ տպաւորութիւն ձգելու ամպագոռոգոռ ցուցադրութիւններով: Ատոր ապացոյցը Քրիստոսի եւ Անոր Խօսքին մէջ հետեւողականօրէն

մնալու վիճակն է, Անոր մէջ անասան ուրախութիւն ունենալն է, անկոտորում հաւատարմութիւնն ու առատ յոյսն է:

«Տէ՛ր, ապրէ՛ մեր կեանքին մէջ, լեցո՛ւր մեզ յորդացող յոյսով ու փառաւորէ՛ Քո՛ւ անունդ»:

Նէյլ Պուքման

Կործանուած՝ թղթախաղի պատճառով

Երեկոյ մը երեք երիտասարդ աղջիկներ՝ սեղանի մը շուրջ նստած էին: Անոնցմէ մէկը՝ տրցակ մը թղթախաղի քարտեր ունէր: Ետին՝ երիտասարդ մը կանգնած էր, որ այդ տան ընտանիքին անդամներէն մէկն էր: Մաքուր նկարագրի տէր երիտասարդ մը: Երիտասարդ աղջիկներ՝ զանազան առիթներով այդ տան մէջ կը հաւաքուէին թղթախաղով զբաղելու մինչեւ կէս գիշեր: Ամէն անգամ աղջիկներէն մէկը կ'առաջարկէր երիտասարդին որ իրենց միանայ, բայց ան քաղաքավար կերպով կը մերժէր: Այն աղջիկը որ կարենար համոզել այս երիտասարդը՝ մասնաւոր յիշատակութեան պիտի արժանանար՝ դժուար գործ մը գլուխ հանած ըլլալուն համար: Մինչեւ այդ իրիկուն՝ որեւէ մէկը չէր յաջողած: Երիտասարդը կ'ըսէր թէ ոեւէ մէկը պիտի չկարենար զինք համոզելու: Գիտակից էր, որ թղթախաղը՝ կրնար բախտախաղի վերածուիլ, ու իր կործանման պատճառ ըլլալ:

Այդ իրիկուայ աղջիկներէն մէկը՝ ուզեց ինք ալ փորձ մը ընել: Բացառիկ գեղեցկութեամբ օժտուած գրաւիչ աղջիկ մըն էր: Դառնալով երիտասարդին ըսաւ. «Այս խաղը չորս հոգիով կը խաղցուի, մենք երեք հոգի ենք, չե՞ս ուզեր մեզի միանալ որ շրջանակը ամբողջանայ»: Երբ տեսաւ որ երիտասարդը նպատակ չունէր միանալու, շարունակեց ու ըսաւ. «Միայն այս իրիկուն խաղցիր՝ ու անգամ մըն ալ մի խաղար»: Պարզ խօսակցութիւն չէր: Աչքեր, այտեր ու շրթունքներ՝ լիովի կը գործակցէին առաւելագոյն չափով յարձակումը ազդեցիկ ընելու: Պահ մը վարանելէ յետոյ՝ երիտասարդը յօժարեցաւ: Ամբողջ որ մին-

չեւ այն օր եղած յարձակումներուն դիմադրած էր՝ անակնկալօրէն տեղի տուաւ: Անկէ յետոյ, իրիկունները՝ ուր որ հաւաքուէին՝ այդ աղջիկը երիտասարդը իր հետը կը տանէր: Ժամանակ մը ամէն բան լաւ գնաց, բայց երիտասարդին վախը գլուխ եկաւ: Սկսաւ դրամի համար խաղալ: Գիշերներ կ'ըլլար, որ մինչեւ առտու սեղանին շուրջը նստած կ'ըլլար: Ժամանակ մը ետք վեներական հիւանդութեան վարակուեցաւ: Քանի մը անգամներ որոշեց բոլոր մոլութիւններէն հրաժարիլ եւ հին օրերուն երթալ՝ բայց չկրցաւ: Մէկ հիւանդութիւնը միւսին առաջնորդեց: Դրացի հովիւ մը զինք այցելեց, ու երիտասարդը հետեւեալ խոստովանութիւնը ըրաւ. «Եղածէն տարբեր մէկը կրնայի ըլլալ. բայց շատ ուշ է: Համոզուած եմ, որ գերեզմանէն անդին ուրիշ աշխարհ մը կայ, ու երբ խորհիմ որ իմ մեղսալի կեանքիս համար արդար հատուցում պիտի ըլլայ ինձի՝ աննկարագրելի սոսկում մը կը զգամ»: Ասոնք վերջին խօսքերն էին: Գերեզման իջաւ 35 տարեկան հասակին մէջ: Երիտասարդ զգուշացի՛ր:

«Երիտասարդը ինչո՞վ մաքրէ իր ճամփան: Զու խօսքիդ համեմատ անոր զգուշութիւն ընելով» (Մաղ. 119:9): «Որդեակ իմ, եթէ մեղաւորները քեզ զլխէ հանել ուզեն, դուն անոնց հաւանութիւն մի տար» (Առակ. 1:20):

Քաղուած՝ «Օրինաբեռ նոնենին» գրքէն

Գիտենք, ով Հայր, որ աշխարհի այս ձգնաժամային օրերուն, մենք Զեզի պէտք ունին: Պէտք ունինք Զու զօրութեանդ, առաջնորդութեանդ, Զու իմաստութեանդ: Լուծուելիք հարցերը մարդկային իմաստութեամբ չեն լուծուիր:

Զու իմաստութիւնդ ու զօրութիւնդ տուր անոնց որոնք առաջնորդի դերը վերցուցած են: Անոնք թող զգան իրենց անկարողութիւնը եւ Զեզ փնտռեն: Անոնց պարկեշտութիւն, քաջութիւն եւ բարոյական նկարագիր տուր, որպէսզի խոստովանին իրենց անկարողութիւնը:

Մեզի Դո՛ւն առաջնորդէ, յիշեցնոր մեզի որ մեր Աստուածը ամուր վէճ է եւ ոչ թէ խրճիթ մը, ուր անհոգ կրնանք ապրիլ: Ան ուժի շտեմարան մըն է եւ ամէն ուրիշ զօրութիւն կը գերազանցէ:

Հայ քրիստոնէական առաքելութիւն

1998 թ.-ին խիստ ծանրաբեռնուած էի Հայաստան այցելելու համար: Սկիզբը միայն ձմեռները կ'այցելէի. վեց անգամ այցելեցի ու ականատես եղայ զերոյէն ցած 35 աստիճանի: Այժմ 22 այց կատարած եմ: Իմ կոչումս էր՝ Աւետարանը հասցնել Հայաստանի աղքատներուն, երթալ այնպիսի վայրեր, որտեղ ոչ ոք չէր ուզէր երթալ ու տեսնել այնպիսի բաներ, որոնք ոչ ոք չէր ուզէր տեսնել:

Հայաստանն այսօր շատ տարբեր է, շատ առումներով մրցունակ է այլ երկիրներու հետ: Այսօր ոչ միայն հայերը կ'այցելեն Հայաստան, այլև աշխարհի տարբեր կողմերէն օտարազգի մարդիկ: Բայց եթէ ուշադրութեամբ բնենք խուլ փողոցները ու որոշ փակ դռները, ապա կը հասկնանք, որ Հայաստանը աղքատ երկիր մըն է: Բնակչութեան 30%-ը աղքատութեան շէմէն ցած է:

Կը խնդրեմ մի՛ սիրէք երկիրը, այլ սիրեցէ՛ք ժողովուրդին, եւ հոգ տարէ՛ք անոնց մասին:

Ես կը փափաքէի, որ մարդիկ Հայաստան երթային ոչ թէ եկեղեցական շէնքերը, գիւղերն ու յուշարձանները տեսնելու, համադամ կերակուրներն ու զինիները ճաշակելու, տուն վերադառնալով՝ Հայաստանի որքան լաւ ըլլալը բոլորին պատմելու, այլ ասոնցմէ աւելին ընէին: Ես կը խորհիմ, թէ մեր ըրածը բաւական չէ այս աղքատ ժողովուրդին օգնութեան ձեռք մեկնելու: Շատ պապիկներ ու մամիկներ կան, ովքեր կը պայքարին աղքատութեան դէմ, գումար, սնունդ եւ առողջաբանութեան պարագաներ չունին: Անոնք բնակարանային սարսափելի պայմաններու մէջ ապրող անյոյս մարդիկ են: Երեխաները նոյն խնդիրներուն կը բախուին. ձմռանը տաք հագուստ չունին, իրենց տուններն ու անձերը ձմեռուայ ցուրտէն տաքանալու հնարաւորութիւն չունին, տաք ջուր չունին, ամիսը մէկ անգամ ցնցող կ'ընդունին, դպրոց երթալու համար հագնելու կօշիկ չունին, դեղորայք չունին: Կան մարդիկ, ովքեր կը տառապին արեան բարձր ճնշումէ, մաղձաճարպէ կամ շաքարախտէ: Լաւ պայմաններէ պարզապէս զրկուած մարդիկ են:

Աստուածաշնչին մէջ կը կարդանք, որ «աղքատները միշտ մեզի հետ են». այն, ինչ կրնանք ընել, անոնց մասին հոգ տանելն է:

Ո՛չ, հայերը ծոյլ չեն: Անոնք ծանր իրավիճակներէ ու հանգամանքներէ անցան՝ ցեղասպանութիւն, համայնավարութիւն, պատերազմ եւ երկրաշարժ: Նայեցէ՛ք Նիւ Եորքին ու տեսէ՛ք, թէ փողոցներուն մէջ քանի անօթեւան կայ: Նայեցէ՛ք Աւստրալիային ու տեսէ՛ք, թէ բարեգործական քանի կենդրոններ կան, որոնք հոգ կը տանին Աւստրալիոյ աղքատներուն:

Բարեգործութիւնը կը սկսի այն ժամանակ, երբ կը սկսինք սիրել ժողովուրդին: Ամսական 100 ԱՄՆ տոլարի աջակցութիւնը կրնայ օգնել աղքատներուն: Աղքատութիւնը մարդկանց կը նուաստացնէ, անոնցմէ արժանապատուութիւնը կը խլէ ու թերսնուելու պատճառով երեխաներուն ֆիզիկապէս ու հոգեպէս անկայուն կը դարձնէ: Գիւղերուն մէջ այսպիսի շա՛տ մարդիկ կան: Ո՛չ, ասիկա թշնամիին ձեռքին գործը չէ. ասիկա մեզմէ իւրաքանչիւրիս ձեռքին գործն է:

Այդ իսկ պատճառով, մօտաւորապէս 22 տարի առաջ սկսեցինք Հայ քրիստոնէական առաքելութեան ծառայութիւնը, որպէսզի Աւետարանը հասցնենք այն հեռաւոր գիւղերը, որտեղ մարդիկ երբեւէ չեն լսած Աստուծոյ ու Յիսուսի մասին: Մենք սնունդ կը բաշխենք, դրամական աջակցութիւն եւ բժշկական ծախսերու օգնութիւն կը տրամադրենք, հագուստի, կահոյքի, վարձավճարներու, կրթութեան եւ այլ կարիքներու համար օգնութիւն կը ցուցաբերենք: Բազմաթիւ հայկական եւ Աւստրալիական կազմակերպութիւններ, ինչպէս նաեւ անհատներ ծանօթ են մեր գործունէութեանը եւ ակտիւօրէն ներգրաւուած են անոր ծառայութիւններուն մէջ: Եթէ կ'առաջնորդուիք նոյնը ընել, կամ եթէ կը փափաքիք դրամական նուէր ուղարկել, ապա կարող էք այցելել մեր կայքէջը՝ www.acmaust.org, կամ էլ-նամակ ուղարկել մեզ՝ info@acmaust.org հասցէին:

Հ. Գ.